

SCHOTTEDICHTER



Fasnacht 2023

Emozioone statt Emissione

Äntlig, äntlig - und do sinn alli froo,
kaa me d Fasnachts-Emozioone wider uuseloo,
nach däre Abstinänz isch nit nur der Waage glaade,
nous sommes Goorteesch – ooni dermit der Umwält z schaade

*Doorum sinn mir – dasch phänomenaar,
nit schäädlig underwäggs – nai klimaatisch neutraal,
statt numme mit haisser Luft z blagiere,
dien mir ökologisch schoonlig intrigiere*

Wenn de as Waggis iber d Wettstai faarsch,
und aine schreit: Waageglygge, vorwärts, marsch,
jo denne sinn mir voll derby
und eerscht no mit griener Energie

*Au bim Wuurfmaterial - e riise Hit,
nämme mir nyt mit Plastik mit
und s PET duesch bitte nit eerscht am Moorge,
sondere im rächte Bhälter grad jetz entsoorge*

Nach unserem Comebägg diens denn alli raffe
und mir wärde s uff die näggschti Blaggedde schaffe:
als Waggis gsesch uns dert druff brilliere
und mit de Orangsche flott jongliere

*«Jetzt längt s!» maint au e Aggtivischte-Schaar,
mit Demo-Daafele – gmoolt ganz wunderbar
und glääbe die sich an d Strooss derno,
muess dä Drägg ewägg ewägg ewägg – he jo*

In der Pause im Schooffegg der Maage stopfe
und nach 2 Lüzli e digge Mogge glopfe,
Lääberli vor em Hotel Basel und denn zem spiele,
e feine Schnäderänte-Kaffi und das ganz ooni z briele

*Mit em Draggdoor schliesslig hämmer gwunne,
dä laufft ooni Diesel, derfiir mit Sunne,
denn produziersch au am Goorteesch zvyyl CO2,
blybsch jo gscheiter grad dehai*

Im Schotte-Käller no e ungspritzte Wysse,
derno mit guetem Gwisse in e Bio-Kääskiechli bysse
und bisch deert der Letscht – hesch s nit begriffe,
maint der Hübse-Dani mach s Liecht ab du Pfyffe!

*Emozioonsloos kasch derfür d Greta glatt vergässe,
die gsesch zwar no immer Tofu frässe,
aber si feent ihr Hoor ojeeminee,
synt neischtem mit Strom vom AKW*

Doch si kemme grad wider – die Emozioone,
wo sich am Änd fir alli loone,
so dass uns s Fieber ab de Viere paggt:
«Tout Bâle» ensemble – ebbe zämme im Taggt!